

PCN a kumpra The Hill Compound na Sint Eustatius

Oranjestad / Kralendijk- E fondo di penshun Hulandes Karibense (PCN) a disidí pa kumpra e kompleho históriko The Hill Compound na St. Eustatius. Kompra di e kompleho ta pas den e maneno di invershon lokal ku e fondo a establese resientemente. E kompra di The Hill Compound ta e di dos proyekto di invershon na St. Eustatius den algu ménos ku 2 siman di tempu. E preparashon pa e transakshon a tuma kasi un aña.

Harald Linkels, presidente di e direktiva di PCN, ta masha kontentu ku kompra di e edifisionan. “Durante kada bishita ku nos, komo direktiva, a hasi na St. Eustatius nos a kana pasa e kompleho aki ku ta situá den sentro di Oranjestad, St. Eustatius. Kada bes nos tabata bisa otro kon bunita e proyekto aki lo por ta anto kon importante e lo por ta pa desaroyo turístiko di e isla”.

Miembro di direktiva Roy Hooker, ku ta representá e islandnan di St. Eustatius i Saba den e direktiva di PCN, a hala atenhon di e otro miembronan di direktiva, ora ela tende ku e kompleho tabata na benta. Durante hopi aña mi a traha djies banda di e edifisionan aki ku ta bunita i tin un balor históriko importante pa e isla. No solamente mi ta pensa ku for di un balor históriko mester kumpra esakinan, pero mi ta konvensí tambe ku ora Statia sigui desaroyá, eskai lo resultá di ta un bon invershon pa PCN”, segun Hooker a bisa.

PCN a prepará e kompra di e edifisionan huntu ku entre otro Walter Hellebrand di Monument Foundation na St. Eustatius i ku eksperto riba e tereno di monumento, Michael Newton di *Newton Heritage Consulting*.

Newton, huntu ku e conseheronan di Curaçao Financial Group (CFG) a biaha bai St. Eustatius pa wak e edifisionan personalmente i pa studia e posibilidatnan pa no solamentu restorá esakinan, pero tambe den futuro genera un rendimento riba e invershon. Na St. Eustatius, Newton i CFG a haña ayudo di e kontratista lokal Wim de Jong, pa determiná e kondishon físiko di e kompleho.

"Ainda mester tuma desishon kiko lo bai hasi ku e edifisionan aki. Awor ku e kompra ta un echo, nos ta bai traha plan un konkreto pa e restorashon, pero tambe nos ta bai papia ku algun partido ku tin un interes den eksplotashon komersial di e kompleho”, asina Linkels a bisa. Segun e presidente di PCN ta agregá, e echo ku e kompleho ta keda nèt banda di e ofisina di gobiernu di St. Eustatius i tambe hopi serka di e edificio di RCN, ta puntonan positivo.

Direktiva di PCN a bisa ku nan ta kontentu ku e manera ku Minerva Van Putten di Excellency Consultancy na St. Eustatius a guía e prososo. “E proseso i e preparashonnan a tuma largu i señora van Putten a mustra kompreshon i pasenshi den esaki.

Segun Harald Linkels, PCN ta studiando vários otro proyekto na St. Eustatius ainda. “Nos sa tambe ku tin un deseo grandi, spesífikamente na Saba ku St. Eustatius, pa tuma hipotek na PCN. Sin embargo, nos no a tuma desishon ainda si nos ta bai ofresé e posibilidat aki. Nos a tuma bon nota e deseo i lo studia e posibilidat aki, huntu ku nos conseheronan, den mas profundidat” según Linkels ta bisa.



*Potret: un impreshon di The Hill Compound ku
kara pa laman. Potret: ir. Michael Newton*